

Euskal Herrirako Energi Plan Estrategikoa adostasunez taxutzeko eskatu du EHk

Zenbait proiekturen luzamendua proposatzen du, plangintza bateratua egin arte

Gorane Agirre/Bilbo

Euskal Herri osorako Energi Plan Estrategikoa diseinatu beharra aldarrikatu zuen EHk atzo, egungo energi politika «oso kezkarria» delako. Plangintza adostu bitartean, egun egitasmo diren proiektuen moratoria edo luzamendua eskatu zuen.

EUSKAL HERRIRAKO Energi Plan Estrategikoa oinarriko lau faktore aintzat hartu beharko lituzkeela nabarmendu zuen Eusebio Lasa HBko Mahai Nazionalako kideak.

Lehenengo oinarria energi ekoizpena kontsumoaren arabera izatea da, Lasak esan zuenez. Bigarrena, energia kontsumoa gutxitzeko behar diren bideak ezartzea; kontsumoan aurrezteko, prozesuen eraginkortasuna bultzatzea eta fiskalitatea xede horretarako ere erabiltzea. Hirugarrenik, Plangintzak energia iturrien dibersifikatzea ere jaso beharko lukeela esan zuen Lasak, bereziki energia alternatibak sustatuz. Eta azkenik, Administrazioak politika energetikoaren kontrol zuzena izatea, egun proiektu energetiko gehienak ekimen pribatuaren esku baitaude. Lasak nabarmendu zuenez, «energia esparru estrategikoa eta funtsezko zerbitzua da edozein gizarte eredutan; horregatik, kontrol publikoa ezinbestekoa da».



XOUSE SIMAL

Zabalgari proiektuaren aurkako ekologistak, protestan, Bilboko Udaletxean. Egitasmo horren aurka dago EH ere.

Iñaki Antigüedad EHko parlamentarioak «guztiz kezagarritzat» jo zituen egun egitasmo diren hamaika proiektu energetikoak, eta haien moratoria edo luzamendua eskatu zuen, Energi Plana adostu bitartean.

Antigüedadek hainbat arrazoi eman zituen proiektuok «kezagarritzat» jotzeko: proiektu gehienak «legalki aire kutsatuko eskualdean» Bilbo Handian kokatzea; 2003. urtean Euskal Herriak kontsumorako behar duena baino hiru aldiz gehiago ekoiztea; esku pribatuaren dauden proiektuen gainean kontrol publikorik ez izatea; eta «auto-horniketa eta burujabetasunaren izenean, gainproduktzioa ezkatzea».

ahotan hartutakoak

Egitasmoan diren proiektuak

EHk oraingoz egitasmo diren proiektu energetiko hauen moratoria eskatu du.. Hainbat argudio eman ditu horretarako;

Zabalgari • EHko kideen arabera, hondakinak errausteko labeak elektrizitatea sortuko du. Bilbo inguruan eraikiko da labea, eta 25.000 milioiko aurrekontua du. Generale des Eaux, EEE, Bizkaiko Diputazioa, BBK eta Ibar Ezkerreko Mankomunitatea dira bazkide.

Bizkaiko Badia • Zierbenan kokatuko dira birgasifikazio planta eta ziklo konbinatuko zentral elektrikoa. 75.000 milioi pezetako kostua du, eta Iberdrola, Repsol, Amoco eta EEE dira bazkide.

Transpower • Zornotzan eraikiko da, eta ziklo konbinatuko zentral elektrikoa. 65.000 milioiko kostua du eta Electricity Supply Board eta National Power dira sustatzaile.

ICG • Petrolioaren finketak utzitako hondakinak prozesatuko ditu planta honek, gasa erabiliz, eta elektrizitatea sortuko du. Muskizen egingo dute Petronorrek eta Iberdrolak.



MONIKA DEL VALLE

Larruzko berokiak lapurtu dituzte Bilboko denda batetik

Atzo goizaldean lapurreta handia jazo zen Bilboko Luchy Peleteros dendan –argazkian larruzko beroki pila bat lapurtu baitzituzten. 75 milioi pezetako balioa zuten denera berokiek (3 milioi libera). Antza denez, ondo ezagutzen zuten ebasleek dendan zer beroki klase zeuden, azkar egin baitzuten egin beharrekoa, eta garestienak hautatu, gainera.

Euskal Herrirako trenbide ereduaztergai izango da gaur Bilbon

■ ELA, LAB, Hiru eta EHNE sindikatuek bi eguneko jardunaldiak antolatu dituzte

G. Agirre / Bilbo

GIZARTE ikuspegitik Euskal Herrirako interesgarria izan daitekeen trenbide ereduari buruzko topaketak egingo dituzte ELA, LAB, EHNE eta Hiru sindikatuek, gaur eta bihar, Bilboko La Bolsa auzoetxean.

Antolatzaileek garrantzitsua deritzote trenbide ereduari buruzko gizarte interes horiek zehaztasunez definitzeari. Haien hitzetan, «interes objektibo horiek gizarte osoak definitu behar ditu eta ez, sarriegi gertatzen den bezala, baliabide ekonomikoak dituztenek». Esan dutenez, horregatik atondu dituzte jardunaldiak.

Bi eguneko topaketa hauetan lau sindikatuek trenbide alternatiba «koherentea eta gizarteren, ekonomiaren eta ekologiaren ikuspegitik bideragarria» zirriborrotu nahi dute. Jardunaldietan garraio eta ingurugiro adituek hartuko dute parte.

Arrigorriagan, edateko uraren biltegi berrien eraikuntza 2001eko urrian bukatuko da

Erredakzioa / Bilbo

ARRIGORRIAGAKO Bete-luri Tratamendu Plantako ur biltegi berrien eraikuntza lanak 2001. urteko urrian bukatuko dira.

Bilbao Bizkaia Ur Partzuergoko ordezkariak atzo azaldu zuten, biltegi berri hauen bitartez edateko uraren eskariari erantzutea bermatu nahi da, Tratamendu Plantan edo Zeanuri eta Venta Altako kondukzioetan arazorik izango balitz ere.

Biltegi hauek 1.950 milioi pezetako aurrekontua dutela azaldu zuten (ia 78 milioi libera inguru). Dirutza horren %85 Iparaldeko Konfederakunde Hidrografikoak finantzatuko du, eta gainerako %15a, berriz, Ur Partzuergoak.